

■ PUNTG DA VISTA

Glaruna fulla via – il Grischun duess suandar

DA CLAUDIA CADRUVI / ANR

Il 2011 datti a Glaruna empè da 25 vischnancas be pli trais. Il pievel glarunais giavischa questa refurma. Sch'ins avess prognosticà quest svilup avant dus onns, avessan tuts scurlattà il chau e ditg: Insatge uschia è nunpussaivel. Il pievel na vertescha mai ina midada uschè radicala da las structuradas istoricas. Ma il pievel è para pli progressiv che quai ch'ins crai.

Il cumin da Glaruna è sa decidi la primavaira 2006 per in model cun trais vischnancas. Ils adversaris da quest model han fatg opposiziun e ditg che la decisiun saja vegnida prendida a la bahutta. Perquai han ils Glarunais anc ina giada fatg cumin la dumengia passada. Duas uras ha il pievel tadlà en tutta fradaglia ils arguments pro e contra. È suenter duas uras è la decisiun crudada a moda clera per in chantun cun trais vischnancas. Perfin il mastral glarunais *Robert Marti* e la cussegliera governativa *Marianne Dürst* èn stads surprais da la clera prontadad dal pievel da prender a maun la restructuraziun vigurusa.

Il Grischun ed auters chantuns svizzers duessan suandar l'exempel da Glaruna, che stgaffescha vischnancas da radund 10 000 abitants che pon subsister a moda autonoma en il futur.

Dapertut hai num che la vultad per fusiunar duess vegnir da «sutensi» – pia dal pievel. Ma ils votants en singulas vischnancas ritgas vegnan adina a sa spuranar encunter fusiuns cun ils vischins pli paupers. Gist las vischnancas che profiteschan dal tschains d'aua teman fitg da parter lur bainstanza cun vischnancas che han la disgrazia da betg posseder auas che vegnan nizzegiadas per l'energia idraulica. Uschia pon singulas vischnancas bloccar in process ch'è necessari per l'entir chantun u almain per tschertas regions. Quai è malgìst e nundemocratic.

En il figl uffizial da Glaruna stattan indesch mortoris sper sis naschientschas. L'enconuscent lieu da vacanzas Elm n'ha quest onn anc gì nagina naschientscha. Quests fatgs ha ina giuvna glarunaisa enumerà la dumengia passada sco arguments per la refurma. Ils medems argu-

ments valan era per las regions grischunas, cunzunt per las 30 vischnancas che han pli pauc che 100 abitants, ma era per las 100 vischnancas che han ina popolarziun tranter 100 e 500 abitants. En talas vischnancas datti ozendi pli paucas naschientschas che avant 70 onns en ina solia chasada catolica. En talas vischnancas èsi già oz problematic d'occupar tut ils posts. E cun tgi occupeschan questas vischnancas ils posts en 50 onns?

Blers laudan l'autonomia da vischnanca, e na cumpran nagut en la stizun da l'agen vitg, ha in oratur remartgà al cumin da Glaruna. «Autonomia» u «identitad» èn chavazzins che crodan gugent, sch'i va per defender las structuradas existentas. Ma tge munta questa autonomia insumma? Ils daners èn uschè stgars ch'i sa tracta savens plitost d'ina agonia che d'ina autonomia.

En il sectur da scola sa restrenschescha l'autonomia forsa anc sin il fatg ch'il cussegl da scola po eleger la scolasta. Ma era quest privilegi va a perder cun ils gronds consorzis da scola, nua ch'ina

cundecisiun democratica n'è betg pli pussaivla. Gist per la scola fischan vischnancas da 10 000 abitants, sco quai ch'ellas vegnan furmadas a Glaruna, ina schliaziun prudenta.

E pertutgant l'identitad: Tgi che viva en ina vischnanca cun pliras fracziuns sco per exempel Trun u Sumvitg, lez sa: Ins na perda betg sia identitad sco abitant da Zignau u sco abitanta da Surrein, mo perquai che l'agen vitg tutga tar Trun u tar Sumvitg. E sche Trun e Sumvitg furmassan uss tuttenina ensemble ina vischnanca, dastgasan ils da Trun era vinavant esser loschs da lur Cuort Ligia Grischina, ed ils da Sumvitg fissan vinavant loschs da lur bellezza clutger. Il sentiment d'identitad na dependa betg da cunfins da vischnanca.

Ina refurma sco a Glaruna ha sa chapescha era disavantatgs. In u l'auter canzlist sto spustar sia piazza en in center, e davart la zona da bajegiar a Rüti decidan en il futur betg mo ils 422 abitants da Rüti, mabain er ils abitants dals vitgs vischins. Privilegis van a perder. Quai è dolurus.

En tut prendi procurà la refurma a Glaruna dentant per in resvegli, constatescha cussegliera governativa *Marianne Dürst*. Ils Glarunais èn loschs ch'els èn ils emprims en Svizra che dumognan il sbargat ord las structuradas veglias. La decisiun dal 2006 haja procurà per nov schlantsch en il pitschen chantun muntagnard, di Dürst. In tal resvegli faschess era bain ad auters chantuns.

A Glaruna ha in singul burgais inizià quest moviment cun ina cunterproposta al cumin la primavaira 2006. En il Grischun na datti sa chapescha nagin cumin, ma i dat avunda instruments politics per metter en rocla ina votaziun chantunala per furmar vischnancas pli grondas. I duvrass dentant in u l'auter politicher u ina gruppaziun che han il curaschi da far diever da quest instrumentari. Il cumin da Glaruna da la dumengia passada mussa: Il pievel ha saun giudizi ed è pront da far il pass necessari vers il futur. Ils Grischuns votassan probabel er uschia. U vules insatge forsa pretender ch'els Grischuns sajan main curaschus ch'els Glarunais?